

PENGARAH ADNAN SEMPIT BUAT PhD INDUSTRI DI UUM
Unit Komunikasi Korporat

Telah Dihantar: 20 April 2011 18:46

Kepada: UUM - All Staff; UUM All Students

20 APRIL 2011/16 JAMADILAWAL 1432H

=====

"UUM : UNIVERSITI PENGURUSAN TERKEMUKA"
(THE EMINENT MANAGEMENT UNIVERSITY)

Oleh: Nasiha Abdul Rashid

Gambar oleh : Shamsaimi Ezil

Pengarah Adnan Sempit Buat PhD Industri di UUM

UUM ONLINE: Walaupun sibuk dengan promosi filem terbaru arahan dan terbitannya, Ahmad Idham Ahmad Nadzri, telah memohon untuk menyambung pelajaran dalam peringkat PhD Industri, yang ditawarkan oleh Universiti Utara Malaysia (UUM), dengan menyerahkan borang permohonan kemasukan kepada Naib Canselor UUM, Prof Datuk Dr Mohamed Mustafa Ishak di UUM, semalam.

Mengulas mengenai permohonan Ahmad Idham yang memilih untuk menyambung pengajian di universiti berkenaan, Dr Mohamed Mustafa berkata, ianya akan memberikan input terbaik buat universiti serta industri perfileman tempatan.

"PhD Industri memberi tumpuan kepada para profesional dan pengamal industri dalam menghasilkan inovasi dan meningkatkan daya saing melalui penyelidikan berasaskan industri," katanya.

Beliau berkata, usaha ini bakal menggalakkan perkongsian pengetahuan antara pengamal industri dan ahli akademik dalam melahirkan profesional yang berpengetahuan tinggi".

"Ahmad Idham akan menghasilkan tesis PhD yang berasaskan bidang perfileman tempatan, terutamanya berkaitan permasalahan, cabaran serta bagaimana mengatasi halangan terbabit, dalam memastikan industri ini mampu berdaya saing dengan industri filem serantau dan global," katanya.

Menurut Dr Mohamed Mustafa lagi, dengan penghasilan tesis itu juga mampu dijadikan bahan rujukan dan kajian kes untuk pemain-pemain industri yang lain, selain membantu penggubal dasar dalam membantu untuk mempertingkatkan industri perfileman tempatan.

Sementara itu, Ahmad Idham yang juga pemegang ijazah perakaunan dari sebuah universiti tempatan berkata, usahanya untuk melanjutkan pengajian dalam bidang PhD merupakan satu intepretasi usahanya dalam membantu mempertingkatkan industri perfileman tempatan.